



Молитва

предъ образомъ Песчанской Божіей Матери

Тебе Матерь Божію хвалимъ: Тя, Маріе, дѣву Богородицу исповѣдуемъ: Тя превѣчнаго Отца дщерь вся земля величаетъ. Тебѣ вси ангели и архангели и вся начала смиренно служатъ: Тебѣ вся власти, престолы, господствія и вся превышнія силы небесныя повинуются. Тебѣ херувими и серафими радуящися предстоятъ и непрестаннымъ гласомъ вопіють: святая Богородице Мати, полны суть небеса и земля величества славы плода чрева Твоего. Тебе преславный апостольскій ликъ своего Творца Матерь восхваляетъ: Тебе мучениковъ множество Богородицу величаетъ: Тебе преславный исповѣдниковъ сонмъ Бога слова храмъ нарицаетъ: Тебе господственніи полцы всего дѣвства образъ проповѣдуютъ: Тебе вся небесная воинства Царицу небесную восхваляютъ. Тебе по всей вселеннѣй Церковь святая прославляетъ, Матерь Божію почитаючи: Тя истиннаго Царя небеснаго отроковицу превозноситъ. Ты еси ангеломъ госпожа, Ты еси

райская дверь, Ты лѣствица царствія небеснаго, Ты царя славы чертогъ, Ты ковчегъ благочестія и благодати, Ты еси бездна щедротъ, Ты еси прибѣжище грѣшныхъ, Ты Мати Спасителя, Ты, освобожденія ради плѣннаго человѣка, Бога воспріяла еси во чревѣ. Тобою попоранъ бысть врагъ: Ты отверзла еси вѣрнымъ двери Царствія небеснаго. Ты одесную Бога стоиши, Ты Бога за насъ молиши, дѣво Маріе, иже будетъ судити живымъ и мертвымъ. Прими, все-милостивая Мати и госпоже, сіе малое хваленіе устъ и сердець нашихъ и не презри моленія насъ грѣшныхъ. Тебе дадеся отъ всевышняго благодать во еже всѣхъ заступати и избавляти отъ скорби, нужды и болѣзней, зане сама лютыя скорби претерпѣла еси, взираючи на вольное страданіе Сына Твоего возлюбленнаго и Того на крестѣ распинаема зрящи, егда оружіе Симеономъ предреченное сердце Твое пройде. Тѣмже убо, о Мати премилосердная, вонми гласу моленія нашего, утѣши насъ въ скорби сущихъ, яко вѣрная радости ходатаица, предстоящи престолу пресвятыя Троицы, одесную сына Твоего Христа Бога нашего, можеша, аще восхощеши, вся намъ полезная испросити. Услыши моленіе наше и избави отечество наше — страну Россійскую отъ обстоящихъ бѣдъ, скорбей и напастей. Изжени всякую крамолу и крамольныхъ человѣкъ лукавая разруши совѣтованія, паче же тѣхъ самыхъ въ покаяніе приведи. Се зриши бѣду нашу и скорбь, яви намъ милость Твою, посли утѣшеніе уязвленному печалію сердцу нашему, покажи и удиви на насъ грѣшныхъ богатство милосердія Твоего, подаждь намъ слезы покаянія ко очищенію грѣховъ нашихъ и утолѣніе гнѣва Божія, да съ

чистымъ сердцемъ, совѣстію благою и надеждою несумнѣнною прибѣгаемъ къ Твоему ходатайству и заступленію. Поборница непобѣдимая буди намъ недостойнымъ отъ лица врагъ нашихъ, покажи на насъ древнія милости и чудеса Твоя. Прилежно раби Твои ко Твоему божественному предстательству прибѣгающе и пречудному образу Твоему съ умиленіемъ прибѣгающе, смиренно молимся Тебѣ, благой и милосердной заступницѣ: предстательствомъ угодника нашего — святителя Іоасафа, епископа Бѣлоградскаго, вонми гласу грѣшныхъ моленій нашихъ, не презри воздыханій отъ души, виждь скорби и бѣды насъ обышедшыя, и яко любвеобильная воистину Мати потщися на помощь намъ безпомощнымъ, унылымъ, во многія и тяжкія грѣхи впадшымъ и присно прогнѣвающимъ Господа и Создателя нашего, Его же умоли, предстательница наша, да не погубить насъ со беззаконіи нашими, но да явитъ намъ челоуѣколюбную свою милость. О всемилостивая госпоже, Царице Богородице, воззри милостиво на предстоящія предъ святымъ образомъ Твоимъ люди сія усердно молящіяся Тебѣ и сотвори предстательствомъ Твоимъ и заступленіемъ у Сына Твоего и Бога нашего, да никто же изыдетъ отсюда тощъ упованія своего и посрамленъ въ надеждѣ своей. Къ кому убо прибѣгнемъ, аще не къ Тебѣ, владычице! Кому принесемъ слезы и воздыханія, аще не Тебѣ, пресвятая Богородице. Не имамы бо инья помощи, не имамы инья надежды, развѣ Тебѣ, Небесная царице. Подъ Твой покровъ притекаемъ и вѣруемъ, яко въ образѣ семъ Твоемъ, его же обрѣлъ святитель Божій Іоасафъ, сама Ты ниспосылаеши Твое матернее благословеніе

странѣ россійстѣй и коемуждо дому на тя упо-
ваніе имущему. И да будетъ образъ сей лица
Твоего намъ стѣна и забрало и утверженіе,
врагомъ же нашимъ страхъ и пораженіе: на
него же мы вси людіе Твои взирающе, надежду
на Тя несумнѣнную имамы. Тебѣ молимся,
образъ Твой святой цѣлующе: помилуй, покрый
и соблюди и огради Твоимъ заступленіемъ
и настави ны на путь спасенія въ семъ вѣцѣ,
и будущемъ вѣчныя изми муки: яко благосло-
венна еси и препрославленна нынѣ, присно
и въ безконечныя вѣки вѣковъ. Аминь.

Тропарь

предѣ Песчанскимъ образомъ Божіей Матери

(гласъ 8-й).

Днесь, яко солнце пресвѣтло, просія въ
Россійстѣй странѣ всечестная икона Твоя, Вла-
дычице, | юже святой Іоасафъ святитель во
градѣ Изюмѣ обрѣтохъ. | Свѣтло празднуемъ,
благовѣрніи людіе, честнаго образа обрѣтеніе,
молящися прилежно: | Владычице Богородице,
молися Сыну Твоему, Христу Богу нашему, |
избавити страну Россійскую отъ варварскаго
плѣненія | и междоусобныя брани и всѣхъ
навѣтъ вражіихъ: || Тебе бо едину заступницу
имамы.

Изданіе Нарвскаго Преображенскаго Собора.